

Na ebandeli, Nzambe atiaki Adamu mpe Eva kati na elanga ya Edeni. Na tango nyonso oyo bazalaki kuna, Biblia eyebisi biso ete bazalaki bolumbu, kasi bayebaki te ete bazali bongo. Kasi sima ya lisumu kokota, nde bayebaki ete bazali bolumbu. Yango elingi koloba nini?

Na ebandeli, tango Nzambe akelaki bango, atiaki na miso na bango “EZIPAMELI MOSANTU”, oyo ezalaki kosala ete bayeba lisumu te. Ezipameli yango ezalaki eloko mosusu te kaka Molimo Mosantu. Kasi tango batombokelaki Nzambe, ezipameli yango elongwaki. Yango wana Nzambe asalelaki bango bilamba ya lopo mpo na kobomba bolumbu na bango.

Kasi uta tango wana, Satana mpe abandaki kotonga Edeni na ye moko, malembe malembe, mpo azongisa bato lisusu na bolumbu mpe alongola bilamba oyo Nzambe alatisaki bango.

Sikoyo pene na mibu nkoto motoba eleki banda Adamu akelamaki, mpe Satana azali kokómisa makasi Edeni na ye, na kotiaka bato “EZIPAMELI NA YE YA MBINDO”, mpo bato bázala na lisumu kasi bamona yango te. Yango ezali likama monene mingi.

Na kala, soki mwasi atambolaki na pantalon na nzela, bato bazalaki komona ye lokola mwasi ya pite. Kasi lelo oyo, bilamba yango ekómi

bilamba ya momesano, kino kokota na bandako ya losambo. Eleki lisusu mosika: bilamba mike-mike mpe oyo emonisaka nzoto polele ekómi likambo ya momesano, mpe bato bakamwaki lisusu te.

Ozali komona te ete oyo ezali ezipameli ya Satana oyo ezipi bato kozanga bango koyeba? Mpe mibali mpe bazali komimonisa nzoto na bango polele, kaka na bilamba ya kati. Lelo mibali mpe basi bazali kotambola lokola banyama na bolumbu na nzela kozanga soni.

Edeni oyo ya Satana ebandaka liboso na molimo.

Tozali komona ete Lingomba ya liboso oyo bantoma babandisaki ezalaki na ezipameli ya Molimo Mosantu; misala nyonso ezalaki kosalema na bokambami ya Molimo ya Nzambe mpe na bopeto. Kasi na lingomba ya suka oyo tozali kobika kati na yango lelo, ezipameli yango elongwe; oyo etikali ezali ezipameli ya Satana, oyo esalaka ete moto akóma langi-langi (vuguvugu) mpe amiyeba te.

Okoki komona mwasi akoti na losambo pene bolumbu kasi amoni te ete azali bolumbu. Mobali azali mosumuki ya ekobo kasi amimoni lokola azali sembo liboso ya Nzambe. Moto azali molangwi, kasi amibengi mokristo ya peto. Mobali azali kolata makwele (rasta) mpe amoni ete azali na mabe te. Mokristo azali kosambela bikeko kasi azali komona mabe te,

nzokande Biblia elobi kosala bongo te. Moto abongoli motema kasi azali mosengenyi mpe ayokaka te ete motema na ye ezali kokweisa ye. Bongo mpe makambo mingi mosusu.

Ezali polele ete tozali kobika na eleko ya Lingomba ya suka oyo babengi Laodikia. Nsango oyo Nkolo apesi biso ezali oyo:

Emoniseli 3:14-22 (Mokanda na Bomoi)

14 — Komela anzelu ya lingomba ya Laodikia ete: Tala oyo alobi Ye oyo azali Amina, Motatoli ya sembo mpe ya solo, ebandeli ya bozalisi ya Nzambe:

15 — Nayebi misala na yo: ozali malili te mpe ozali moto te. Elingaki kozala malamumu ozala malili to moto.

16 — Kasi mpo ozali langi-langi, ozali malili te mpe moto te, nakobwaka yo libanda ya monoko na ngai.

17 — Ozali koloba: “Nazali mozwi, nakómi na bomengo mpe nazangi eloko te,” kasi oyebi te ete ozali mobola, moto ya mawa, mosikini, mokufi miso mpe bolumbu.

18 — *Nazali kopesa yo toli: somba epai na ngai wolo oyo epetolami na moto mpo okóma mozwi; lata bilamba ya mpembe mpo soni ya bolumbu na yo emonana te; mpe pakola miso na yo nkisi mpo omona.*

19 — *Baoyo nyonso nalingaka, nakebisaka mpe napamelaka bango; yango wana sala makasi mpe bongola motema.*

20 — *Tala, natelemeli na ekuke mpe nazali kobeta. Soki moto ayoki mongongo na ngai mpe afungoli ekuke, nakokota epai na ye mpe tokolia elongo.*

21 — *Moto oyo akolonga, nakopesa ye kofanda elongo na ngai na kiti na ngai ya bokonzi, ndenge ngai mpe nalongaki mpe nafandaki elongo na Tata na ngai.*

22 — *Moto oyo azali na matoyi ayoka oyo Molimo azali koloba na mangomba.*

Lokola ozali komona, tozali komona biso moko lokola bazwi, kasi na solo tozali babola mpe bolumbu.

Yango ezali bilembo polele ete ezipameli ya Satana ezipi lingomba ya suka. Tozali kobika na mikolo ya likama.

□ Bongola motema.

□ Yamba Molimo Mosantu, mpo Ye nde elembo ya Nzambe oyo ekobikisa biso na eleko oyo ya suka.

Bóbosana te: soki Molimo Mosantu azangi, konetolama (unyakuo) ekozala te.

Soki oponi kolanda Nkolo, landa Ye solo.

Soki oponi kolanda Satana, landa ye solo.

Kozala langi-langi te.

Talá video oyo ezali na se mpo omona ndenge mokili ekómi mpe ndenge Edeni ya Satana ekóli, mpo oyeba ete tozali solo na mikolo ya likama, epai bato kotambola bolumbu na nzela ekómi lisusu likambo ya kokamwa te.

Lokola Satana abebisaki Edeni ya Nzambe, ndenge moko mpe Edeni na ye ebongisami mpo na libebi oyo ekómi pene.

Nzambe apambola yo.

Share on:
WhatsApp